

欽定重修兩浙鹽法志

欽定重修兩浙鹽法志卷二十五

商籍二

人物

明

黃金色字鍊之休寧人仁和籍隆慶戊辰進士授
晉江令敦教化厚風俗預籌海防巨寇曾一本以
戢再任德興令多惠政陞南京戶部主事以嚴正
不阿權相罷歸踰年起南京禮部祠曹值大旱具
疏以純心格天爲言得俞旨又疏陳六事曰緩刑

辟寬逋負愼起用明學術開言路嚴修省因忤貴
近移疾歸久之起南比部郎歷廣西參議道著有
四書述說性鑑蒙求等書

休寧縣志

程朝京字元直休寧人錢塘籍萬歷癸未進士授
江西鄱陽令邑多逋賦京立週知實徵二冊課遂
如額靖難時廷尉胡閏殉節坐戍者數十家已歷
二百餘年未得釋京按籍除之且祠廷尉於芝山
歲大饑捐贖鍰二千金畀富民市穀分十二區平
糴存活甚衆陶丁乘饑倡亂繫鵲湖之磧推藍芳

威爲首聚衆六千一夕建寨三百餘所京悉令居
民保甲團守率丁壯去鵲湖一舍而陣賊勢窘遂
降京力言芳威於上官貸死戍邊後卒爲名將舉
卓異授南刑部主政晉禮部郎擢泉州守乞養歸
母病衣不解帶沒廬墓三載服闋補永平守時稅
璫方熾京議以他費充稅毋擾民璫聚黨將爲變
京悉鋤之因灣水運天津糧至闕家口省輓輸數
倍晉漳南憲副

休寧縣志

汪有功字祖倩歙人錢塘籍萬歷甲辰進士宰蒲

圻值水災力請折減設蠲賦法民便之尋入南臺
疏十餘上如勸青宮講學劾巨璫亂閩當誅藩宦
不當僭祭孝陵與不便蘆田管業及張差肆逆危
及國本當會訊窮治其姦俱切中時弊按江南捐
贖錢二萬餘以論張差事忌者乘間中以危法尋
得白擢行人司副陞尚寶寺丞

欽縣志

汪翥字彥初歙人萬歷乙卯舉於鄉上邊策特賜
進士歷任遼左至總兵緣勦高麗駐兵覺華島天
啟初閣部孫承宗經略遼東委翥司陶事築寧遠

城後與經略議不合棄職歸隱錢塘之安溪山及
方一藻代經略迫起之加都督同知賜蟒玉師駐
松山兵寡糧盡力守歲餘城陷死之子僑字思古
甫十二齡尋收父骸徧歷險阻九死一生得之戰
場中遂奉母同載歸里人咸謂父忠子孝云錢塘縣志
汪漸磐字石臣休寧人浙籍萬歷己未進士令高
要邑當兩廣之衝殫力拊循嚴馭吏寬治民六年
課第一時魏璫用事引病去嗣晉儀曹陞山東督
學僉事主貢選及丙子鄉試所拔皆寒畯時考天

下學臣績又第一遷充東兵備道磐究心理學受業於龍溪王畿所至正文體端士習著尚書宗印

宋賢事彙行世

休寧縣志

吳麟徵字聖生休寧人海鹽籍萬歷戊午登浙江榜壬戌成進士歷任吏科給事中剛直不阿嘗面折首輔於朝李自成犯京師徵守西直門城陷自縊守所

皇清賜諡貞肅

浙江省志

汪汝吉歙人總角時父貿易江淮間二十年不歸

吉長日念父悲號白其母曰兒不見父何以爲人
遂泣別出門踰越險阻足蹟幾徧天下凡窮鄉僻
壤無不密爲諮訪越二十年遇父於蜀之瀘江奉
以歸里時父年七十餘母猶存吉年亦五十矣形
容枯瘠鬚髮俱白家人不識也

舊志

吳麟瑞字思玉萬歷進士任常州府推官一切豪
右繩之以法疏剔白糧織造諸弊以蘇民困妖人
葉朗生馬道人煽惑吳越間瑞計擒亂首誅之歷
任參政分巡九江流寇擾江楚駐節袁州作瞽論

萬言極陳時政之弊不得達告歸尋起偏沅巡撫
時三楚已陷瑞破產募勇士束裝就道適兵部奏
裁沅撫遂回籍後聞弟麟徵殉難痛哭得疾作自

祭文而卒

浙江
省志

程元瑜歙人萬歷丙子舉於鄉授溧陽教諭署縣
事值歲旱瑜步禱烈日中暑氣鬱蒸遂遭疾卒贈

縣令其曾姪孫川編集遺文十餘卷行世

舊志

葉應元字仁伯原籍新安徙武林爲郡庠生註易
解闡連山歸藏之微發王弼管輅所未發講學授

徒髣髴驚湖鹿洞有司屢徵辟不起

錢塘縣志

吳曰慎歛人專精理學著有周易本義翼巡撫張伯行上其書

御纂周易折中多採其說從祀朱子學者稱爲敬庵先生

舊志

汪文演字以道號賓石萬歷時中官高時夏奏加浙江鹽稅演上書御史葉永盛得免歲徵十五萬又與同邑吳雲鳳與商籍如河東兩淮例歲收俊士如額建崇文書院以祀朱子而立十八州縣配

引行鹽之法課源不匱至今賴焉同邑潘景升爲

作傳華亭董其昌書

舊志

汪汝謙字然明歛叢睦人萬歷丙子貢生年十三而孤嶄然如成人事母捧手肅容視氣聽聲七十年如一日於諸兄姊同仁均愛從無間言收族三黨婚嫁葬埋及緩急叩門無不應善屬文有春星堂文集夢草軒詩集雙青閣法帖行世業鹽桐江急公辦課杜絕私販桐民至今賴之子孫曾元以科第世其家稱望族云

舊志

吳元溟字澄甫自歛徙錢塘精醫萬歷間浙大疫
隨父道川施藥療治日活多人事繼母至孝女弟
少寡無依養之終身故人程某負課千金久繫獄
溟代償之崇禎庚辰歲大饑溟出橐金糴米五百
斛散給親友與同郡王道焜雲間陳繼儒嘉定黃
淳耀交契官光祿寺署丞壽八十二

舊志

程紹文字闇然號鶴峯歛西塘人總角時以孝行
稱年十二補博士弟子員中天啟辛酉副榜講易
於西湖與同里汪汝謙發明義理時嵯使葉永盛

創立商籍紹文偕汪文演吳雲鳳等建崇文書院

著有鶴鳴集程子類纂等書

浙江
省志

吳文清字元鑑父岷泉慕神仙遠遊不歸文清年十四告母尋父裹糧歷諸省會險阻備嘗卒從中州物色得之相抱痛哭堅請歸里色養終身有司屢辟不起後清病子宏模割股祈代康熙甲子模

子耀舉孝廉

錢塘
縣志

宋應祥家貧有志操客池陽旅舍得練囊於橐蓐間貯二百五十金祥止三宿不去有許邦偉者偕

其弟邦佐踉蹌來問主人遺金主人許之許欲赴水死祥得實還之許以半爲酬堅不受同舍義之

子承武好學能文力葬三世恩撫五甥

浙江省志

吳暉字宜中生有至性年十二父紹昌以貢赴闕中途疾發卒於舟中櫬歸暉徒跣哀號一慟幾絕事母備極孝養年五十不改孺慕居憂服闋遇諱日輒易服涕泣如新喪叔紹達無子暉以禮當繼孫乃以次子籀出嗣復經紀其兩世喪葬獅子峯下後自營葬卽附其傍曰吾以此慰叔父心也以

明經授分水教諭年八十七子筠康熙庚午解元

已丑成進士

舊志

汪尚廣字大中號思苓歙人勇於從義時歙河淤塞廣請於官首倡疏濬歙人至今賴之少保胡宗憲以平倭功遭讒罷祀廣論復之先是廣祖誠義因賦役繁重有免徵之請有司不能行里中尤苦絲稅廣控於大司農奏悉平之郡守董石表其廬曰世德重光來遊武林開商籍濬運河立義倉修道路執政上其事於朝予爵一級事詳陶望齡集

董其昌黃汝亨陳繼儒各有傳

舊志

吳之龍字雪門歙人生有異姿治春秋八歲完三傳落筆成章長遊武林從學使葛寅亮講學湖南業日益進屢蹶棘闈遂絕意進取謁選得光祿丞與米友石劉半舫諸人日倡和還隱西湖結竹閣

社四方詞人歸之

錢塘縣志

汪文華字君實歙庠生性至孝母歿廬墓三年哀毀骨立遂得疾尋卒父衡字南嶽業浙鹺數十年人咸服其公直鄉人有欲棄產者嘗與其值而不

收其業誠慷慨慕義人也

舊志

吳憲自新安來錢塘初試額未有商籍業鹺之家艱於原籍應試憲因與同邑汪文演力請臺使設立商籍上疏報可至今歲科如民籍例科第不絕皆憲之倡也教子醇謹深得王昶命名之意四子俱壽至九十餘人咸謂吳氏有隱德云

浙省郡縣各志

汪之琦字奇玉休寧人爲錢塘諸生著作甚富精岐黃於鹺務尤諳練一時業鹺者爭相延致決疑問難掀髯立辨人服其才崇文書院飭課之會與

諸友勗始實首壇坫有雞窗尺牘行世子岳字岳

如積學能文入海寧庠著舒嘯堂集

舊志

吳鳳翔歙人崇禎時由商籍入仁庠潔清自矢劇

愛黃山西湖焦嵩諸勝日持一杖挂一瓢任意往

來有所作卽投瓢中自號天瓢子族子昌集其文

名曰天瓢集

舊志

吳敏惠休寧人業鹺來杭建城東土橋新壩費萬

金不貲商民均利至今土人猶稱爲吳公新壩

舊志

國朝

吳夢鼎字仲鎮休寧人補杭郡庠生由庚辰歲貢
舉賢良方正順治二年浙撫張純仁知其才委攝
蘭谿縣事時窄溪土寇竊發捍禦力竭罵賊不屈

死之

錢塘縣志

汪用成字克賢號濟懷歙人少以孝友稱年十四
家中落嘗從百里外負米養親每漏盡出至次日
漏下歸罕有知者過婺州南門拾一布囊啟視皆
黃白伺其人還之迄今八詠樓前猶豔稱其事明
末奉母避蹟山陰時風鶴交警逆旅中凡寢處服

御以及甘旨之供一如平時尤人所難魯藩強召再三佯狂不就因著有狂吟集

舊志

吳山濤字岱觀崇禎己卯舉於鄉三任學博授陝西成縣令彈丸小邑且當兵燹殘破後錢糧協濟極爲民累抵任力請題改邑人戴之任二年致仕投老湖山嘯歌自得書法秀逸自成一家兼善作畫爲世所珍出關日賦西塞詩三十首因自號塞翁年八十七無疾終

錢塘縣志

程光禪字奕先新安人寄籍錢塘順治辛卯舉於

鄉生平孝友醇謹出宰湖廣石門縣清廉惠愛一

時翕然有召杜稱三逆叛殉難官署

舊志

鮑經綸字欽生歙人業鹺寄籍錢塘順治辛卯舉人授陝西鞏昌令叢山劇邑民番雜處前任以逋賦累於官者六人壬子秋淫雨不止綸單騎三赴皋蘭泣陳其事始得蠲賦額鄰封四邑亦得邀赦竟以勞瘁卒於官白陽間井等戶各建祠祀之番人哀悼之聲聞數百里

錢塘縣志

趙吉士字天羽號恆夫休寧人順治辛丑會試副

榜任山西交城令地僻而險明末羣盜踞其中吉
士至縣卽閱武於郭南申明保甲團練之法奉檄
進勦先日置酒張樂越宿復邀賓從翦燭賦詩夜
半送客出郭卽疾行四十里饗士卒於水泉灘進
葫蘆川據三坐崖賊皆驚逸獲渠魁數十餘黨悉
降又開高離山通水道溉田十萬餘頃治邑五載
凡修學宮立義倉次第具舉又罰贖令種桺於清
源文水間延袤四十里夾道垂蔭民號曰趙公桺
巡撫上其績徵爲戶部郎旋授戶科慷慨直言凡

民情疾苦條晰無遺後以著述終老寄園奏疏外
有交山平寇四卷音韻正訛四卷詩詞數十卷年

七十九卒

錢塘縣志

胡文學字道南歙人順治壬辰進士任真定府推
官時巨寇高鼎據恆之西山絕頂并代絳晉俱騷
動文學一意招撫鼎率衆出降擢福建道御史出
按兩淮鹽法輯鹽政通考著淮鹺本論內陞京堂
需次歸康熙十年

召赴京師至濟上以疾歸卒

浙江省志

項景襄字去浮錢塘人順治壬辰進士由檢討歷
官至兵部右侍郎景襄在翰林究心掌故及副兵
樞參密勿毅然有爲時烽燧雖息而瘡痍未平定
謀決策天下想望其丰采己未夏刑部疏請收五
流之例應徙邊者無論遠近戍烏喇景襄力爭曰
五流非死法也今戍烏喇卽無生理卒從景襄言
山東瀕海多捕魚爲業巡撫議凡駕大航出洋者
罪以通海景襄曰山東與內海不同江浙海寬無
礁易泊山東一望蒼茫無艤舟地且沿海業許民

捕捉船許容二百石海船非篷桅不可行今姦吏
乃以此羅織愚民設陷阱而殺之乎由是皆免遂
著爲例時聽贖難民有以病棄中途者親屬以爲
請有司勿敢從咨兵部景襄曰旋師棄俘必待部
文始聽歸則遷延月日其人已死矣請令有司核
實遣歸不必申部至如溫台百姓三十九家來京
贖其子女既有印結是良民卽宜放還不當取其
身價其遇事敢言如此卒

賜祭葬

錢塘縣志

吳雯清字魚山號方漣歙人順治壬辰進士授潯
州司李時粵西初開官無廨舍結茅而居案牘中
有大疑滯訊鞠立剖會峒寇薄城下民驚竄清堅
守不爲動城賴以全未幾寇引兵窺潯兩臺將勦
之清不可單騎入賊壘曉以大義寇皆懾服來降
兩臺交章薦之

召爲江南道御史疏請慎重民牧禁邪教造督捕獄舍
並得

俞旨所著有寒潭吟星槎草聞見錄行世

歙縣志

徐旭齡號敬庵休寧人錢塘籍由順治乙未進士
歷官總漕潔己愛民多惠政卒於官

諭賜祭葬諡清獻先世居玉山父一鴻徙家錢塘仍授
徒於故里順治戊子山賊竊發鴻被害辛卯齡往
求父屍走邑之四都長號於途夕暝遇樵人止宿
爲言曾識鴻當求之西村管平山中是夜夢父攜
示屍所且曰問之毛廿八齡卽戴星往有一嫗見
之曰君非徐先生子耶先生被害於魯家倉齡拜
之復行風雹大作齡慟哭絕壑間有虎突躍過不

爲害忽見童子跨牛背而歌齡叩之引入茅舍一
父老出齡曰丈人非毛廿八乎父老驚駭告以故
乃指空林間土微掩處齡恍惚如夢所見急齧指
血沁之卽解衣裹骨而歸鄉人奇其事有繪徐孺

子負骨圖者

杭州府志

汪之萼字壑庵歛入母病中夜泣拜於庭剖股肉
二寸投藥以進母卽愈後寓婁東父病劇倉卒歸
誤入盜艘萼終夜號泣盜憫其孝舍之盡奪其囊
篋而去惟篋有一硯爲父所珍萼乞還硯盜擲之

草間比歸父歿葬南屏山夢廬墓終身遂歿墓所
長子于翰能文章有聲庠序家世業鎡有蘇松瀕
海票地崇禎十四年募議請建所陞課增引併設
官署翰承先志於康熙七年赴部呈請一如前議
額銷至九萬餘與弟翼雲于高于藩一堂聚處兄
友弟恭食口四百餘人其一困庖家庭禮讓肅若

朝典仕至內閣中書

舊志

汪士嶠字仲修歙人補錢邑庠少有大志每以忠
孝自期康熙甲寅耿逆之變獻平閩八策和碩康

親王畱侍軍中劄委同知乙卯夏隨

王師進討克復永康縉雲等縣時被掠子女哭聲載道
嶠具啟親王盡得遣歸是年九月奉親王諭入閩
招撫爲逆黨曾養性祖宏勳所執慘毒備加罵賊
以死崇祀鄉賢

錢塘縣志

江之崑字玉鄰歙人業鹺常山縣康熙甲寅夏閩
逆亂賊帥吳安邦入城崑被擒罵賊不屈賊怒欲
殺之子世晟求代父死同日被戮崑妻張氏長媳
曹氏欲自盡孫女如娟大呼曰請先母死無取辱

曹先勒殺之二氏遂自縊忠孝節烈備於一門

常山

縣志

吳瑗字伯玉性孝友好學能文當魏闢竊柄海內
競建生祠謀侵瑗父所建考亭書院地瑗毅然拒
之生平不好釋氏嘗曰人不思聖賢至老畏死則
口作異域語以求懺悔殊可鄙也順治間子鑛以
進士仕粵西瑗諄諄以公明平恕勗之兄弟四人
俱九十餘歲晚居湖上不入城市人稱一門四皓

云

錢塘縣志

吳琦字稚圭明崇禎時大司馬閔夢得薦賢良方正授別駕謝不應天性純摯鍵戶讀書手不釋卷著尚書翼註行世與其兄瑗弟璠炎年並登九十里人爲繪商山四皓圖以貺之

仁和縣志

吳璠字子與父憲疾革璠割股以進居母喪泣血三年目爲失明康熙甲寅值閩變鄰郡子女多被俘掠璠傾家資代贖完其父子夫婦者幾千人又杭會四方雜處多客死無所歸者璠創悲智社劇金斂之歲率爲常臺使者歷旌其門年九十三以

壽終

錢塘縣志

吳名溢字我施崇禎間補錢邑諸生時婁東甬上諸名宿舟車絡繹皆主其家鼎革時棄舉子業不復出兩喪皆廬墓著喪禮註晚年構藥園於城東與嚴沆查繼佐柴紹炳闕鍵丁文策袁于令祁豸佳吳山濤輩觴詠其中有藥園盍簪集查繼佐序之明季文體詭變尙諸子雜說仙釋語錄溢沉酣六經闢發實義作麟經詮解考三傳互異折衷諸家著春秋詳註卒年七十六

錢塘縣志

戴大受字與可號華琳嗜古力學凡諸子百家無
不博覽尤精研五經傳註務爲窮理之學於性理
一書尤鉤元探奧因喟然曰聖賢之道聖賢之心
也聖賢之心亦卽吾心也自少至老每十載輒成
一書皆手自編輯其已刻行世者曰世寶錄醒心
錄蓄德錄蓋集古嘉言懿行而品節之多與人爲
善之意其老年剝草皆發舒胸次所得錢塘縣志次子
尚友天性孝友嘗闢一圃爲色養地昆弟終身無
間言三子尚霽以孝友重於鄉一生禮法自持與

其兄並以耆德稱孫儒冠仁庠洪磁成進士任陝

西安定縣有循聲題改涇陽縣

舊志

汪勦原名起鰲字匡洽號帖庵歙人補杭郡諸生
中崇禎壬午科副榜博洽多聞下筆千言立就順
治戊子江右萑苻竊發接壤徽郡四境剽掠勦詣
閩帥乞師掩捕帥發卒千人擒治里中獲安勦供
芻糧具牛酒師猝至餉犒不移時而備帥深器之
父遭誣逋賦動以千計勦挺身獨任不以累弟姪
晚事母孺慕猶若嬰兒他如宏推解賙貧乏矜意

氣重然諾皆其天性然也孫泰來乙酉

召試充武英殿纂修壬辰成進士官潮州司馬

舊志

鄭吉士字有章歙人少孤力學年二十中順治庚子鄉試數上春官不第就教職初任桐鄉殫心訓迪暇輒棹小舟就各村鎮集生童而校之改衢州教授所陶淑者甚衆陞四川樂至令蜀殘破旣久墾荒者多占土民已熟之產因匿糧故爲所占吉士令其自首完賦遂爲定業民便焉上官聞之檄行通省準是爲法以年老乞休著有敝篋詩存數

十卷

舊志

朱恆字子鶴年十四割臂肉以療父疾明季歲
歉嘗佐父襄賑里中樂善不倦同懷七人友愛至
老嘗推已宅讓其兄又仿蘇氏族譜范氏義田立
省墓法儀文器具畢備侍御顧豹文爲文以表其
事

舊志

吳文翰字元濬篤志力學幾失明補郡庠生未幾
入龍泓山著書自娛時與方外爲蓮社遊登山賦
詩寄託高遠郡守嵇宗孟思見不得乃屏車徒就

山中訪之相見寒暄外無一語及時事嵇大歎服

而去

錢塘縣志

吳紹昌字有聲歙人寓錢塘屢中副車稟性孝友與人交不苟合尤欲以禮處人有故人子來謁不拜紹昌責之曰吾父執也命之拜改容而接之同里有負人多金者迫歲除欲死紹昌急以金授之曰金易耳何至輕生耶其好義類如此

郡邑各志

江廷光字大紳歙人祖業鹺遂居杭時值中落父世楠客崖州卒光奔喪赴崖適父柩爲海水漂沒

光沿海濱哭尋三晝夜見沙際一棺驗得題記一
慟嘔血數升力疾徒步扶櫬悲號中途嘔血不起
有僧見而憐之納其父柩於庵且爲斂焉

舊志

吳以鏌字在梵幼孤與伯兄竭力事母以孝友聞
鼎革後隱居教授生徒不求仕進家藏書數千卷
手定丹黃凡有裨於世道人心者鈔集成編名迪

德錄徵士吳農祥爲之序

錢塘縣志

汪鳴瑞字旂來號白史歙人九歲能詩讀書通大

義

國初隨父渡錢塘主光祿徐二采家總戎方國安來
呼瑞拜不應鎮婺將軍朱大典至則踰階拜之光
祿叱童子不知禮趣之去更呼問之對曰忠邪兩
途不敢妄拜未幾土寇竊發購瑞父甚急時瑞父
匿壁間賊竟持瑞去瑞笑紿之曰惜吾父往杭若
在此肯令若擒我耶賊信其言乃得釋年十二補
仁和諸生聲稱籍甚與叔用嘉有大小汪之目事
親孝色養七十年讀禮之日不改孺慕先是浙撫
陳秉直徵宏博科金鉉舉賢良粵撫金聲桓辟廣

州倅俱以親老辭不就卒以明經老兩浙商籍入
學無定額瑞陳學政遂定其數運使高熊徵開紫
陽別墅課在籍諸生瑞力贊成之甲寅之警濱海
歲供不辦瑞挾策上書全活甚眾著有然石草十
六卷程墨青來選本行世善書尤工飛白手書格
言八則訓子健師晉師卒年七十三

舊志

程光祖字香升食餼仁庠生平敦孝友古樸自處
力學善書居家不求贏餘毋許子孫矜言祖業以
脩脯膳寡嫂寡姪媳請表雙節得沐

恩旌舊志

汪之涵字偉生新安人順治初以才望與薦辟當
得縣令謝不應授餘杭訓導捐葺學宮請廣入學
額侍郎嚴沆稱其端規礪俗有安定之風紳士爲
勒石明倫堂以頌之未幾歸家著書自娛年八十

餘卒

錢塘餘杭各志

吳秋字雁市十歲能詩立志不肯下人已乃見章
淇遂驚禮曰是吾師也淇於古文則師昌黎於詩
則師孟郊盧仝而秋獨枋爲生割排突之調跳蕩

自喜康熙甲寅由閩入粵時耿逆未平所善友爲
亂兵所縛徒步千里往救之轉客沅湘間歸疾作
且卒歎曰吾死無繼吾爲詩古文者

錢塘縣志

汪用嘉字南炎號蘧亭歙人隨父來浙補紹郡諸
生嗜古好學於書無所不讀尤邃於周易性至孝
藉脩脯以供甘旨怡然色養年四十會母喪泣血
三年哀毀成疾瀕死者再乃棄舉子業隱居授徒
發明先儒性理諸書奧旨從游者日衆生平持已
端方而不忤於物後遊京師時錢塘黃機爲大宗

伯甬江史大成爲大司成皆布衣交勸畱京師嘉
不應南歸著有借山樓詩文集十二律方員圖大
易廣互圖大易兒訓等書

舊志

吳維楨字左廷隨父名溢授經名溢名噪復社維
楨以總角從遭歲歉輟業年十六事居積奉養二
親垂白同孺慕年六十餘遭母喪哀毀骨立與弟
嘉枚同室居女兄貧迎養於家終其身性伉直不
屑屑與人寒溫及人有急難輒推解排救不少靳
事已無德色尤篤族誼方閩逆倡亂民間子女被

俘楨捐千金倡贖事聞制府李之芳深獎異焉以

子炳官封國子監學正壽八十有六

錢塘縣志

汪宗縉字元宰號靜庵黟人少嗜學隨父徙杭父歿縉盡出已資以與弟時值歲歉施粟潮鳴寺全活甚衆浙撫范承謨修築官塘勛助多金衆建崇文書院捐資獨先至於疏引緝私有關國計諸務當事皆諮訪焉年八十一以子肇衍官封奉直大

夫崇祀鄉賢

舊志

葉生字又生號作庵歙人仁和籍少孤貧好學入

深山鍵戶十年不出山中積雪兼旬生自炊糜讀書不輟以明經薦爲溫州訓導設立學規集六邑諸生而課其藝不期年士風丕變溫士請於學使者從祀名宦著有麗宗簡存因是錄最古園皋嘯

集等書行世

杭州府志

吳日紅字旭初號慎齋休寧人天性孝友歲時食物必先奉其親親食始食母病刲臂肉和藥以進病稍痊後復不起日紅哀痛過甚死而復蘇日於靈几前進酒設奠事死如生旣服闋每逢忌辰鳴

咽不勝生平好施與修途路造河船凡三黨之貧

乏者莫不周恤壽七十餘

舊志

汪肇衍字子四黟人業鹺居杭康熙甲辰進士授
庶常改刑部主事纂修

本朝實錄授編修壬子典陝西試稱得人乞假終養
以孝稱性恬退嘗徒步閭里遇塾師執禮甚恭事
諸父如兒童時生平敦實行黜浮名崇祀鄉賢

浙江

省志

汪于高字昭武號睡庵之萼子也性至孝如其父

父廬墓得疾高年十一獨行省親十里外迷所向
遇親故欲挈之歸不可因與偕往父歿事諸兄尤
循謹勇於行義名重鄉閭善肇窠書字大如堵所
掣筆長八尺生平意氣一於書發之嗜酒能詩兄
歿遂斷酒不復飲者三十年

舊志

程肇都字廷周號厚庵歙人父業鹺入籍錢塘性
至孝父過遂安經連嶺六十里陟歷崎嶇歸語肇
都因捐資修砌建亭置宇以成父志父母歿旣葬
每朔望必往墓祭寒暑無間弟開周夫婦早歿遺

孤五歲飲食教誨無異已子及長出已資而中分之姪予以半二子共分其半諭其子曰非我於汝等薄也所以慰先靈也子鐸鉞俱有文名

舊志

戴朝立字茂才事父母先意承志兄弟友愛尤篤性剛方然諾不苟自處儉約不蓄私財不飾車服不履公庭遇人緩急竭力周恤排難解紛義形於色人咸稱爲長者以子璫官贈內閣中書舍人

舊志

吳炯字明止號毅庵新安人弱冠遊郡庠天性孝友嘗邁无妄幾蹈不測炯挺身自任不以累諸弟

事卒白族黨咸稱之著有易纂鈎元行世子觀垣
字六平幼失恃事繼母至孝折節讀書不妄交遊
康熙癸卯舉於鄉任義烏縣教諭振興士風講學
不倦卒於官

舊志

鄭旭旦字扶曦世居歙之紅橋徙錢塘早歲入泮
學使陸舜有國士無雙之目家貧與其兄吉士讀
書深山縱橫經史後肆力於詩古文詞以一代作
者自命著有越騷廣陵集字說詩通等書皆窮極
幽渺考證精確集成名曰天籟晚而讀易有大易

臆說一書年七十三卒

舊志

汪煜字寓昭號平齋自新安遷錢塘父賡順治辛丑進士煜少好武挽強控馬膽力過人後折節讀書閉戶絕蹟家多藏書披摘無遺義行文兀傲自成一家言尤工詩康熙乙丑成進士任貴州鎮遠令縣故古大田溪洞多苗民難治煜撫馭有方興文勸義民帖然不爲患戊寅遷吏科給事在職未久疏凡六上其大者條陳河工事宜有造於淮他若慎選學臣引見題補皆號直言煜初席豐饒以

銳志學業不問生產家遂中落及官黃門無儋石
儲死之日同官助斂著有同岑草願學堂集南歸
北征錄及平齋偶存諸稟

錢塘縣志

吳烱字睿思三歲母病不食烱號泣亦不食家人
百計誘之卒不食母瘞烱始跳躍牀蓐間且悲且
喜一時競傳爲異及長性伉直無所依違上浙撫
七郡水利書萬餘言及代償鵲民張佛鬻妻金皆
義舉也子觀垠事親孝於庶母高敬禮尤篤第四

人友愛如同母

錢塘縣志

葉日扶字景升歙人性倜儻好周急親族中貧未娶者助之不能葬者賻之於清泰門外置地數頃爲義冢癸酉火災居鄰數十家俱在烈焰中扶排牆出之頃刻里巷成灰燼扶居獨不燬子之蘅亦

以義舉聞

舊志

許頤齡字友期太學生幼好學善屬文早失怙受母教如嚴師以母命挾策經營甘旨無缺母壽終哀毀骨立戚黨咸稱其孝長兄早歿遺孤僅數歲教養兼至且爲婚娶不異已子遇異人授以秘方

數種不惜重資廣爲施濟求者日益多弗卻也有
負逋者貧不能償願多方寬解更伙助之平生喜

交遊士大夫爭結榮敦戶外屢常滿

錢塘縣志

汪鳴烈字庶驚幼能文貧無以養遂馳驅吳越間

仍手不釋卷二十六補郡庠生事繼母張稱至孝

交友必誠必信人有負者弗計及老放浪湖山以

詩酒自娛年七十卒著有師物吟集

舊志

汪潭字淵如號千尺休寧人曾祖始遷於杭年十

六父病焚香籲天刲股以進遂得愈父母歿喪葬

盡禮與弟滄終身其爨一錢尺帛不入私橐女弟
早寡甥幼延師供讀愛逾已子滄病親視湯藥竟
以弟亾悲愴不勝未匝歲而卒臺使者歷旌其門
爲作傳入志四方紳士多作詩文以誄之

舊志

戴班立字茂齊新安人寓錢塘父年七十一生立
嘗以親桑榆旣迫憂懼時深備極孝養父歿盡哀
盡禮友人朱某爲人中傷立竭力營救事得白其
人酬以千金弗受嘗買一婢詢知爲望族女養爲
己女擇壻遣焉遇杭城火捐金周恤以子普成官

贈儒林郎

錢塘縣志

戴爲穀字季環號靜庵休寧人性孝友讀書明大體痛父母早喪不能奉養終身不茹葷不飲酒不衣羅綺中年失偶不再娶不置妾兄弟五人怡怡如也子五勛以義方咸列膠庠孫永椿成進士官翰林編修永樸及曾孫炳俱登賢書

舊志

吳嘉枚字个臣晚號介庵錢塘諸生從父名溢學名重士林性孝友與兄維楨同居終親年不分析晚棄舉業寓吳下南濠里熏鑪茗盃讀書彈琴尤

工詩畫入逸品故交之已貴者求則勿與有壺山
艸堂詩詞蕭山毛奇齡爲之序卒後長洲尤侗爲

立傳

舊志

汪景龍字雲從歙人年十五來浙有成人度崇禎
戊辰鹽場漂沒竈戶逋負不下千金悉焚其券鼎
革時民遷徙未寧課則虛懸龍議借場買補當事
舉行初寧波下八場場鹽出倉漫無稽查多售私
販龍請於通明壩設稽察之法子夢震居家孝友
根於至性尤好施與賑貧恤乏指不勝屈焉

舊志

汪開祚字方至太學生歙人世有隱德性穎異授
書輒了大義後以養親計驅車吳會間服賈負米
未嘗言瘁執母喪盡禮又慮傷父心承顏娛志備
極委曲事死養生兩無愧焉晚歲望益重鄉飲禮
行邦之賢士大夫咸相推引開祚宣明

聖諭推陳雅化里中熏其德者實多生平不喜經生家
言然好閱覽雖行旅中手不釋卷年逾六十卒大

司成吳苑中翰鮑夔各爲立傳

舊志

吳蕙字又植歙人生平喜讀三傳爲名諸生暇則

習騎射年十五母病祝天願以身代居喪尤能盡
禮囊有羨金卽以周族之貧者時臨安諸邑婦女
多爲寇所掠蕙盡出其家資以贖之嘗至西湖有
異鄉流離將赴水死者厚贈遣之有貧人女已許
配又欲鬻以償逋蕙代爲之償招其壻以女歸之
甬東人三世居杭死後乏嗣數棺暴露蕙覓其族
人贖其喪歸葬遠戚之子鬻爲人僕蕙代爲贖其
父匿其子訟於官郡守嵇宗孟鞫知其詐將重懲
之蕙復爲之求釋其人慚感晚歲杜門不出以書

史自娛訓子孫以敦倫立品壽七十五卒

舊志

汪懋璋號中岳歙人賦性誠慤居家有第五氏之風長兄遠出五寒暑不歸璋尋訪走數千里一載餘不得一日抵南都禱於神得籤訣云逢君學武謾言文遂之武昌復不得旣而武當山賽會往偵之果遇其兄拉之歸一時咸以爲異邑令張濤聞之表其閭曰良番表式

舊志

吳昕字仲徵新安人喜武林山水遂卜居焉善詩畫樂賓朋胸次通豁無城府司鐸永嘉造士有法

晚嘗曰吾欲學向禽棄妻子一遊五岳盡攬天下

奇勝吾志足矣著有松臺集

錢塘縣志

方時字乾行號雨亭歙人補錢塘諸生敦品勵行
日孳孳以獎進後學爲事晚歸新安徧省祖墓遊
黃山作詩以紀其勝與同邑汪用嘉吳觀陞諸人
交闡明先儒理學著述甚富

舊志

吳克成字開雯歙人補仁邑庠生有幹濟才於鹺
政利弊尤悉時承凋敝殫力經營衆咸賴之會有
與巨獄構及當事成毅然身任庭訊言詞侃侃獄

上大司寇遂得白其他濟困扶危疏財仗義之事

不可枚舉年六十三無疾卒

舊志

戴有怡字仲和慷慨有俠士風順治初游饑捐金周濟全活甚衆子國禮授州佐奉親孝代弟輸逋

課若干金凡宗戚貧乏者悉爲婚嫁

舊志

葉日葵字貞如歙人氣節不凡物望歸之甲寅閩變醜業墮課五萬餘葵勅議均攤公私交賴乙丑溫所積欠八千四百餘兩葵傾囊代完其額衆咸得蘇學使王掞高其義撰文勒石紀之有羣盜劫

其課於棲水捕獲皆自知必死葵念其迫於饑寒
轉求釋焉有當事假三百金遣一吏齎償吏置私
橐官追比無償妻子願爲僕妾葵峻拒不納竟焚
其券甲戌歲杭郡大歉葵捐米千石以活饑民郡
守李鐸書羽儀鄉國以旌其門

舊志

汪宏字义生休甯人業嵯遷杭性至孝事兄尤謹
後兄歿於京邸宏鬻產奔喪長號數千里哀感行
路奉寡嫂如母生平從不識長吏鄰有無賴子夜
竊其財宏佯寐俟其出終不言戒子弟曰蓄財當

俾有用否則與暴殄同耳故友老而無家宏養之
三十年歿爲殯葬杭多火災數及其廬輒反風而
滅人皆謂仁德之報年六十六而卒

仁和縣志

許大輅字存殷歙人幼穎異讀書日數行下家貧
棄舉子業治鰈凡事知無不言時有勢豪衆皆側
目輅挺身鋤之順治間竈鹽不產墮課數十萬追
呼無償輅請於當事勸爲折引并包之法於是負
課得清嘗貿易吳閫有逋金以萬計悉焚其券蘇
人顏其門曰萬金市義子志義郡庠生博學能文

兼工書畫

舊志

吳秩存太學生性至孝年十四卽能爲文禦外侮
時構巨獄詞連秩存父庭訊代質抗聲直辨僉都
李之芳按獄左右訶之秩存仰泣曰吾爲父白冤
何以死相迫脅耶後隨父逮京師逾年得釋及歸
左右就養先意承順母得風疾不能臥起晨昏捧
持衣不解帶與弟友愛未嘗析產異居祖塋第不
治者葺之置田以供享祀事兩叔如父一卜地以
安窆窆一迎養以終其身

舊志

吳觀均字履忠少負經濟才爲文操筆立就年十二補錢塘諸生屢困場屋遂棄舉子業業鹺每臺使至輒爲諮訪天性孝友庶母舉兩男二女視與同母無異授餐讓宅婚嫁皆備子姓有不給者賙卹之解紛排難有古人風年七十九卒子五長國鏞壬午舉人

舊志

程邦本歙人少以忠孝自期會耿藩叛逆以布衣謁和碩康親王隸前鋒至古城聞父病篤泣辭歸家世業鹺引地京口貼近淮揚私鹽充斥順治十

六年奉

旨建按鹽廳盤查回空糧腋本籌畫盡善姦私莫能影
射康熙三十九年江南巨梟孔文泰販私淮浙奉
旨緝拏江常鎮道施朝輔擒之本與有力焉杭有二程
夫子祠歲奉祭祀無缺子川食餼錢塘編輯朱子

五經語類

舊志

鄭世迎字寅賓新安人博學負奇氣試輒冠軍客
遊長安名公卿爭相延禮詩歌援筆立就屢躋棘
闈遂謝去放浪湖山慷慨好義急友朋事如已事

戚黨間待以舉火者數百家遊屐所至觴詠流連

有書帶草堂詩彙行世

舊志

吳觀陞字履丹歙人弱冠爲錢塘生食餼有年貢入太學工文詞意氣慷慨有古烈士風居家克盡孝友年已艾猶孺慕不衰與兩弟怡怡終身無間言西湖崇文書院向祀朱子商籍子弟於此肄業歲久廢弛陞與汪鳴瑞力請於當事重新祀典復行舫課人文彬彬稱盛運使李濤序其事

舊志

吳鼎英字仲裕歙人少負偉略值明末季不樂仕

進棄儒業

國初各商未集鼎竭力招徠俾各安業引課賴以無缺饒使潘朝選重其才給額以旌孫龍文以孝友

推於鄉

舊志

程斯懋休寧人仁和庠生事親善養志值父業中落懋艱難拮据不敢令親知親有疾必親嘗湯藥衣不解帶每禱祠願以身代撫弟友愛苦力經營所得盡公諸弟毫無私蓄有勸以分析者涕泣不從迄今子孫同居四世宗族鄉黨咸有孝弟稱

舊志

江東達字爾通歙人性豁達與人交開誠布公不
爽然諾當事亦以其直諒每器重之尤喜振拔淹
滯獎進後人五世一堂子孫科第不絕人以爲長
厚之報

舊志

汪時濟字鴻洲歙人娶唐氏有壺德濟年二十三
而氏歿遂不復娶鰥居五十三年每詔子孫以不
重婚之義業鹺來浙時票地官私混淆濟勦改則
陞課歸所運掣至今便之

舊志

朱嗣初字以肇歙人業鹺兩浙性至孝事父母能

先意承志母患噎症醫者皆以爲高年莫治初侍湯藥調飲食卒能霍然子旦字暢伯錢邑庠生孝亦如之性慷慨見義必爲時有父子以无妄陷獄者旦傾橐救之後其子顯達絕不言報

舊志

江善積字以名歛人生平重信義好施與族黨之間莫不蒙其周恤事父母能色養待弟友愛建宗

祠以妥先靈子作楫登賢書

舊志

吳基承字公業休寧人事親孝與昆弟友愛父寢疾衣不解帶親侍湯藥午夜必詣神前禱祝果夢

神人授靈藥吞之遂愈生平見義必爲昌化縣太平橋爲水衝決承獨捐資重建邑人稱之性恬靜不喜紛華不妄交遊琴書圖史外無他嗜好具才識而恥炫能屢爲鹺使者所重

舊志

方擢字書升少孤事祖母余及母田克盡孝養弱冠有聲庠序貢入成均賢士大夫爭相結納而擢頗以經濟自負先世業鹺故於鹺政利弊尤悉

舊志

吳也魯字次愚仁和貢生端謹好學居兩喪悉遵家禮生平喜施與如捐資以修學宮售產以贖難

民其最著者精岐黃術不受謝堅不能卻則市綿衣以濟貧人製棺木以施暴露至老不倦

舊志

程鉶字穎叔已酉武魁有經濟才松所引鹽向以票地月掣私梟充斥請於官與諸所一體按季歸掣羣推祭酒性慷慨好施捐建二程子祠於吳山

崇祀勿替

舊志

胡德兆字兆行歙西槐人年十三遊庠篤志力學爲名諸生西湖崇文書院歲久圯兆首新之春秋

兩祀無缺子孫以孝友稱

舊志

吳樸字介魯國學生休寧人親疾刲股以進歿後
廬墓三年不飲酒不茹葷其樂善也捨棺木施茶
湯刊感應篇陰隲文以勸世親友有未葬者捐資
以賻其喪子姪有未娶者皆爲之婚嫁

舊志

程之標太學生性孝友少刲股以療母疾及長兄
弟五人相繼以歿標獨養四孀婦八遺孤人咸稱

其友愛

舊志

江文魁歙籍寓錢塘

本朝定鼎之初齟使者訪求諳練鹽筴之商得文魁

畫陳利弊子孫相繼業鹺仁厚信義迄今五世先是鮑郎場煎鹽積用鍋熬鹽皆堅靱不可用後其

孫永請易以盤煎竈商均益

舊志

徐兆隆字芳涵邑庠生蘆瀝場竈籍讀書孝友畱心經濟所著有觀生錄四卷新溪餘論等編晚猶樂善不倦值荒歉減價出粟爲州里倡邑高其行

舉鄉飲賓

舊志

金世臣字舜卿仁和諸生年十四除夜鄰人不戒於火父元輔病在牀褥世仁解已衣披父身從烈

燄中負出肢體灼爛父得無傷父老家居常不樂
世臣曰請父友從父遊有同姓老友時相往還每
至必款飲元輔謂友曰子貧士溷子不安曷至我
家我仲子孝能待客也老友笑對曰向款公飲食
皆公子所設公子偵公所至必以酒食隨之懼公
知故屬勿言耳父卒世臣過老友廬必泣而趨母
俞病艱步履世臣日負母上下樓室母憐其勞止
之世臣跪請曰母年高兒得日負母足矣父母歿
葬於西湖之中台山廬墓三年誠子曰我死可葬

於先塋拜石下不封墓得依父母之靈也康熙五

十六年題表孝行雍正元年

恩詔以孝子從祀名賢世臣得請入祠嚴曾架徐杞均為撰傳見杭府

仁邑志並錢塘縣志

姚之駟字魯思錢塘人康熙辛丑進士改庶吉士

遷御史為諸生時著有類林新詠恭逢

聖祖仁皇帝南巡進呈蒙畱

乙覽梓以行世又有古今體詩鈔雲獲齋詩話杭州府志

汪由敦號謹堂休寧人以商籍補錢塘縣學生浙

江巡撫徐元夢薦充明史纂修雍正二年成進士
由編修洊陞侍讀乾隆元年入直

南書房洊擢工部尚書轉刑部十四年加太子少師
協辦大學士十八年晉階太子太傅永定河決固
安奉

命往勘籌議堵築或請別開新河由敦主仍濬舊河爲
便得

旨允行都下錢少米價昂貴議先支甲米加放月餉錢
市價遂平由敦故以文章受知遇性縝密綜理庶

務審覈安詳出入勤勞夙夜無倦終吏部尚書晉
贈太子太師崇祀賢良祠謚文端嘗出俸賜千金
供先世祠祀仿范文正義田遺意屢掌文衡得人
最盛承輯諸書各館皆爲總裁所著有松泉集最
工書有時晴齋法帖十卷勒石

內廷

杭州府志

張芝夢錢塘人與妻楊侍老父病衣不解帶者經
年先後刲股巡按王元職額表其門

浙江省志
杭州府志

鄭信字履貞仁和人康熙庚子科武舉人質直好

義配銷江陰縣各引地其地僻處江濱淮場對峙
最爲私梟出沒之所信設法巡查堵禦官引得以
暢銷家傳

吳國鐸字子廉歙人中乾隆戊午科舉人考授中
書軍機處行走自幼博覽好學善詩古文詞工書
法訂同郡名士十八人爲質韋文集人有瀛洲之
稱著有古體文一卷青岑閣偶吟二卷兄國鉉亦
知名於時

程燾撰傳

次子藥甲中戊申科舉人

吳同璿字舜玉歙人杭郡庠生一生友愛凡姻族

有告急者解推勿悵胞弟病歿遺幼穉經理教養
悉依賴焉乾隆四十一年請於當事凡商裔貧乏
者公捐恤例以佐薪水至今勿替以長子一惠川
餉議敘

誥封中憲大夫

家傳

俞承起字宏緒仁和人性至孝事後母尤篤雍正
間總督李衛莅浙有承起族弟某從事鹽務因事
觸衛怒衛欲杖某承起以弟早孤孀母苦節撫養
咎之慮傷母心逕上公庭乞以身代衛嘉而釋之

延之署中承起有過人才且諳鹺政衛整飭溫台
嘉各屬引地實皆承起襄贊之功時

世宗憲皇帝下薦舉之令衛列承起名欲聞於

上承起力辭不就浙人業鹽者旣佩其德且高其義焉子

鎮釗均以孝友聞

汪沆撰傳

柴景星字東泉先世自歙遷杭由吏員考授州同
知効力海塘總督李衛知景星諳鹽務題請以鹽
課大使補用授長亭旋乞養家居其時溫台二所
鹺政廢弛衛以景星在長亭時深悉台所機宜令

往配辦台屬引地請帑金資電力廢者以振又以
德清一邑爲販私竊佔景星代爲擘畫遂收成效
時又有朱雲裳字絅齋休寧人與景星同爲李衛
所知景星理浙東引地雲裳理浙西引地衛治鹺
政興利除弊半皆二人之力

公舉事實

汪鑾字玉振歙人雍正間私販者多鑾於石堰場
訪巨梟數十人贈以多金勸歸農旋李衛撫浙整
理鹺務嚴懲梟販多寘典刑於時歸農者皆歡呼

曰汪公活我

公舉事實

吳焯字尺鳬錢塘人九歲能詩嘗與毛奇齡朱彝尊輩講學沈佳園奇齡詢格物同異時焯年最少居下座大言曰本末物也知本卽物格矣因舉黎立武管東溟羅近溪諸家指意竟相往復毛奇齡執手稱畏友康熙乙酉

聖祖仁皇帝南巡召試賦詩稱

旨丁酉

翠華再幸焯奏歲華紀麗續編十卷聖因寺志四卷海潮集說三卷皆宣付內閣焯藏書數萬卷手自點勘

讀書務精小學以許氏說文所引經傳與經典釋

文不相應嘗與無錫朱襄析說文分編經傳以補

釋文之未備著有藥園詩藁渚陸鴻飛集玲瓏簾

詞南宋雜事詩行世

張增撰
行狀

子城字敦復克承先

志殫心羣籍勤加校勘數十年丹黃不去手

杭州府志

汪秦鐳字紫襄歙縣諸生康熙間倡修崇文書院

爲士論所歸勒石院廡

崇文書
院碑記

周京字少穆錢塘國子生考列州同性孝友年垂

艾依依若孺子視弟子女如已出中年遊閩粵燕

趙秦晉間所歷名山大川輒爲歌詩書法奇逸酒
酣興發數十紙立盡晚息影蓬廬結吟社於西湖
酒樓題壁好事者競傳寫之卒年七十有三

桑調元撰

墓誌杭
州府志

陳兆崙字星齋錢塘人幼穎異工制義爲世所稱
中雍正甲辰鄉試庚戌成進士分省學習試用福
建乙卯考授內閣中書丙辰

召試博學鴻詞授檢討累官順天府府尹通政副使太
僕寺卿入直

上書房卒年七十有二兆崙學以心得爲主研究諸經折衷衆說二十二史丹黃並下加以論斷靡不挈其要領詩古今諸體追蹤漢魏盛唐晚乃出入坡谷凡所著述士林咸奉爲圭臬云

杭州府志

項守約字博施少孤奉母訓惟謹至性過人弟早卒撫其子如己子克有成立康熙壬子歲寓海昌潮患湮沒甚衆遺骸多無歸者守約出資立義冢收葬之業釐持大綱李衛撫浙時整飭釐政興利革弊皆從咨詢甚重之居會城東隅地清曠引泉

種樹錯置亭館爲將母計年逾六十牽裳索笑作
斑衣舞此萊園所由號也巡撫莊有恭廉其孝友
以世德家風旌其閭年七十二壽終著有萊園吟

橐家傳

孫灝字載黃錢塘人雍正八年進士改翰林院庶
吉士授編修乾隆元年充一統志纂修官旋典試
湖北三年丁母憂服闋授御史居臺中六年多所
建白言錢法之弊率由銷燬銷燬之弊患在銅少
銅少之弊患在官民分而其力不足以相濟鑄錢

於官所以爲民計也廣銅於民亦所以爲錢計也
去其官與民之見而利溥矣又言督撫叅官每有
委耳目於他人因之偏聽生姦者或授意於標協
之武弁或寄報於親暱之同鄉或密囑於信任之
能員或旁探於効力差遣之下吏刺探非據弊端
有不可究詰者戊辰授光祿寺卿旋簡湖南布政
使下車整飭政務黜陟無瞻顧十六年補授通政
副使祭告南海卻有司餽遺陞太僕卿歷通政使
督學河南稱得士擢副都御史再任通政灝居官

勤慎遇事有執持接人和粹見者服其名德

行狀

倪國連字子珍仁和人雍正庚戌進士由編修累

遷吏科給事中事親孝文筆醇雅詩格清真工畫

善書

汪惟憲尊聞錄載杭州府志

子承寬字餘疆乾隆七年由

舉人考取內閣中書十七年成進士一甲第三名

授編修歷官右中允太僕寺少卿至內閣學士禮

部右侍郎督學順天調戶部倉場侍郎終太常寺

卿承寬久直

上書房進奏詩文屢稱

旨旁通繪事書法尤工

邵晉涵撰墓志

金德瑛號檜門休寧人商籍入仁和學舉順天鄉試考授中書舍人薦舉博學鴻詞乾隆元年會試中式

廷試第一授翰林院修撰入直

南書房累遷內閣學士擢禮部侍郎操文衡者二十
年衡鑑不爽乾隆十二年秋齊魯告饑發帑賑救
而鄒滕以南被災尤劇有司格於例限未敢以
聞十三年春自江西學政還入對言狀甚悉卽日奉

旨展期博濟二十一年秋典試江西道出徐州見黃河漲決與運河通因周諮土人地勢高下堵洩先後之宜奏

聞稱

旨卽日遣大臣往視濬築水患以平二十六年擢左都御史卒於邸第櫬從運河歸鄒滕徐宿間居民夾岸泣送曰微金公我幾不活著檜門詩疑十卷奏

議雜文若干卷

齊召南撰傳載杭州府志

汪沆字西顥錢塘諸生早歲能詩爲學博涉無津

涯大學士史貽直欲薦舉經學以母老辭歸沆好
求有用之學自農田水利邊防軍政古今沿革方
俗利病所在靡不條貫大府多禮致之遇事直言
無隱晚年自定撰著多通達治體鑒然可見施行
者性至孝昆弟友愛未嘗析箸姊寡迎養終其身
惠周戚黨前後葬三十餘棺喜引翼後進著有盤
西紀遊集治上題襟集津門雜事詩青囊解惑并
槐塘文彙四卷槐塘詩彙十六卷論語集註剩義
一卷湛華軒雜錄四卷小眠齋讀書日札四卷詩

話二卷全閩採風錄二卷蒙古氏族略一卷汪氏

文獻錄十四卷新安紀程一卷槐塘識小錄一卷

泉亭瑣事一卷說瘡一卷

邵晉涵撰傳
載杭州府志

子彭壽字

靜甫仁和貢生官鎮江府經歷剖決疑獄百餘案

咸頌公平以沆老告歸著有苔花老屋吟藁

顧光撰傳

汪坤字大隅仁和人康熙甲午舉人淹通六經屬

文立就辭義超卓弱冠聲名藉甚所至傾其輩行

雍正乙酉聘修浙江通志及寧波府志有兄乾事

之如父終其身不忍別財異居待從子如己子著

述甚富

張熠撰傳

子浦字蘅洲仁和諸生內行瀉茂研

析經義不事雕琢卒年三十有二

杭世駿撰墓表均見杭州府志

楊彩字燦英世業鹺以武科隨從叔雍正撫黔時
吳逆甫平疆場未定提兵收復屢著軍功幕下多
名士與海寧查慎行交最善有詩唱和見敬業堂
集軍事竣議敘都司不受旋援例授廣東吳川令
粵省盜賊充斥捐俸購賞設計督緝始盡治豪強
安民業終於任邑人立祠崇祀粵東名宦孫兆正
字天益端方孝友嗣奉三代四孀曲盡歡心初授

兩浙曹娥場上官多重之常委治賑務計口親授
活人甚衆奉檄築修海塘工程盡心經理獨任其
勞爲桑梓衛迄今老鹽倉一帶魚鱗土備兩塘屹
如山立無須修葺者兆正之力居多焉

家傳

王際華字秋瑞錢塘人乾隆十年進士及第授編
修分纂續通考歷官至兵部侍郎調戶部充

武英殿總裁兼工部督理寶泉寶源二局錢法教習
庶吉士請修葺庶常館三十四年晉禮部尚書總
修國子監志三十八年充

四庫全書正總裁加太子少傅遷戶部尚書四十一

年卒諡文莊

杭州府志

戴文燈字光林永椿子藏書甚富皆撮其典要辨
其同異爲文千言立就乾隆甲子中式京兆鄉試
秉鐸東陽文教振興丁丑登會榜授禮部儀制司
著有靜退齋詩彙以子璐官累贈中議大夫太僕
寺卿

施朝幹
撰墓表

程燾字雲軒休寧人仁和籍生而孤露極貧持缺
益盛淖糜母子分以療饑乾隆三年舉於鄉七年

考授中書十三年尚書傳恒經略金川以燾從行
軍功議敘遷武選司主事員外郎充平定準噶爾
館纂修官旋從大學士黃廷桂平伊犁授洮岷道
總理軍需局西師凱旋親至開展核定伊犁屯田
悉中程度事竣乞近省迎養改江南驛鹽道擢安
徽按察使遷安徽布政使移陝西晉湖北巡撫善
於造士楚人德之左遷江西布政使改授太僕寺
少卿性儉約雖貴顯有寒士風

袁枚撰傳載
杭州府志

汪永錫字孝傳錢塘人乾隆十九年進士由編修

歷官內閣學士生平於讀書外無他好督學江西
值

鑾輿五巡江浙選江西士子長於詩賦者至江寧獻賦
得與

召試遂沿爲例四十七年隨

駕熱河以病卒於巴克什營

杭州府志

許浩字藻園錢塘人孝友力學行文有奇氣貢入
成均雍正六年總督李衛修兩浙鹽法志委以採訪
見聞賅洽得其力居多以子樞議敘

誥贈奉直大夫工部主事

汪惟憲撰傳

汪沆字西沆錢塘人原籍歙縣孝子汪之萼孫也性孝友年弱冠棄儒業鹺筭裘克振有壑庵別墅在南屏峯下乾隆十六年恭逢

鑾輿巡幸江浙沆就舊墅增建臺榭蒙

恩親臨觀覽賜名小有天園迨後歷屆

南巡

宸翰疊頒汪氏奉爲世寶晚年居橫山莊祠每晨起必展墓所嘗檢篋中戚族責券悉焚棄之壽及八旬

卒

杭州府志

汪靄字胥原歙縣人以國子生候選州同乾隆十六年恭逢

翠華南幸恩加頂帶二級靄生而穎異始就傅口授成誦及握管文采英英照人佐兩昆理家政葺宗祠增祀產推恩昆季羣從逮姻族鄉閭賑饑恤困經費鉅萬矢志不懈靄有愛女巨室某求媾辭不允徑以歸故友子曰吾不負所託孤也性嗜畫筆意蒼鬱生動

世宗憲皇帝臨雍講藝繪五嶽朝天圖并頌以獻

恩賜筆墨年八十有四卒

鮑倚雲撰傳

許澂字靜夫錢塘人有廩業在太倉及浦江辛壬間大饑首刲平糶設粥廠躬自料檢全活無算故家某貧不能自存鬻其女捐金贖還擇士嫁之

杭州

府志

許溶字月波歙縣人先世遷錢塘性純孝好施與有鬻女抵逋欠者代償之輯菜根談一編多警世語以孫烺官庶吉士

貤封如其官

汪沆撰墓志

子梓字敬旃條析婺郡鹽務事宜

請之上官均市價杜私販積引疏銷額徵無缺郡

人賴之

姚立德撰傳

項廷模字厚齋錢塘人庚午科舉人官翰林待詔
世業鹺父歿後家人折閱殆盡廷模年未及壯卽
售得分已產爲營運本並以贏餘養已析箸之伯
仲氏同衣其爨四世一堂聞者難之母病廷模三
步一叩首詣靈竺大士前虔禱稍間腸澀悉遺裋
褥間婦姚氏以兩手掬出之如是月餘而愈乾隆

五十年

國慶廷模恭赴千叟宴

恩賞御製詩及鳩杖如意等物進謝

恩詩一章采入耆筵盛典性慷慨好施戚黨中待舉火

者甚眾姚氏亦賢孝有聲嘗手著班姬女誠辨誤

三則

平聖臺撰傳袁枚撰合葬墓志

唐琦號竹塢歙縣庠生性至孝少隨父寓武林好

學能詩鄉有書院琦請父新之又葺宗祠以合族

著有竹塢詩文集

鮑倚雲撰傳

許承基字長人歙縣籍錢塘人候選詹事府主簿
父鼎鈞官知州以學行著稱承基善繼先志兄弟
友愛無間性樂施乾隆十六年歲歉出粟平糶二
十一年復倡施賑先後全活無算建宗祠置祭田
百畝又捐義田百畝以睦族又以千金生息爲文
廟歲修他若拯貧焚券濬河築路懿行甚多浙撫
莊有恭熊學鵬先後以事上

聞得

旨褒嘉

顧光
撰傳

弟承堯字仲昭錢塘縣學生事兄甚謹以

母疾刲股成疾其妻吳氏又以夫病刲股不效歿後二十餘年兄承基思念不置乃繪己及弟像曰

連枝圖并錄題贈之言刊刻成集

杭州府志

金肇鐸字自白錢塘人性孝友方成婚而母疾躬奉湯藥不入內室衣不解帶者累月與從兄弟同居無間言好施與歲饑屢出穀賑濟先世居休寧年遠失其墓肇鐸篤志訪求遂得累世邱隴於富瑯村封築如禮復建家祠於杭城嘗以府志久不修欲捐資重刻其子泳承父志續修府志經費獨

任之

杭州府志

諸克任字伊人仁和人乾隆丙辰舉人讀書務求實用知識過人補嘉善教諭長於訓迪應銓知縣嘉善人挽留之克任亦澹於仕進不赴晚遷寧波府教授士論歸之

杭州府志

顧天爵字敬修錢塘人性孝友撫諸弟俾各成立乾隆丙申海水驟溢蕭山被患尤酷居民死以萬計水既退胔骨徧道路天爵首輸千金渡江掩瘞聞而興起者相屬暴露遂以免並葺廬舍之傾圯

者越歲壬子會城疫貧者多無棺以殮天爵復捐金措辦歿之前五年取篋中責券焚之曰我本不望其償毋貽於後其勇於爲善類如此議敘直隸州同知

誥授中憲大夫

胡高望撰傳

嚴果字敏中乾隆庚寅舉人性孝友人品高潔工詩文有山水契嘗遊閩中並覽江淮河嶽諸勝胷次浩然作畫得李流芳筆意著有詩文若干卷弟誠字力開號鐵橋乾隆乙酉舉人工詩善書畫杭

人並稱爲二嚴先生

杭州府志朱文藻撰傳

汪得稻字步山乾隆丙子科舉人性伉直見義必爲積學能文究心性理所著觀靜圖說學者稱之

書法入二王之室

杭州府志

徐嗣曾本姓楊字宛東海寧人生未彌月始之夫徐育爲已子旣長徐氏有子遂復族乾隆丙戌成進士由部曹出任雲南府道適徐氏子歿嗣曾以幼有撫字恩乞長吏疏於

朝願復徐姓

特旨嘉許乾隆丙午臺灣姦民不靖大學士公福康安
率師征勦嗣會時任福建巡撫督輸糧餉兵食稱
足親至海外贊襄軍事蚤夜靡寧逆旣平辦理善
後事宜無不周備奉

旨附臺灣生祠并圖像

紫光閣

家傳

楊曾琦杭州人議敘光祿署正充嘉所總商辦理
江南丁酉埤圩靖江等處帑鹽引地有裨鹺政浙
撫李衛上其事於

朝蒙

恩于議家

傳

汪純粹字惇士黟縣人由商籍補杭府學生性孝友少時母病衣不解帶者數月病劇籲天剖股和藥以進母病頓瘥著有孝慈備覽

黟縣志

汪世勳字捷三錢塘人少穎異九歲爲諸生後循例銓授刑部貢州司主事需次員外郎乞假歸生平直諒肫誠以緩急告者輒傾囊助戚黨中有貧女未字爲擇配理裝送之先世居黟縣宏村省視

邱壘惠周宗族有雍睦風

行狀載杭州府志

汪家珪字問松錢塘人父歿於龍泉柩歸遇水幾
漂沒家珪誓以身殉拜號援救得免伯兄蚤世撫
其遺孤加於諸子姊寡而貧迎養於家婚嫁其子
女業師歿妻子貧乏月餽糜餼以爲常

杭州府志

張曉字旦升山陰人熟諳溫台鹺務總督李衛知
其才委任之曉悉心擘畫改場竈就鹵地設附鍋
法以廣其煎商竈賴之復築塘於竈地外以捍海
潮餘坦成田數萬畝至今頌之名其田曰商餘

齊召

南撰

子廷俊字彥超授職州同知敦倫睦族嗜學

工詩著有沼遠山房詩鈔懷舊集及天台雁宕西

湖諸遊草

顧光台山懷舊集序

楊夢槎字再鵠江蘇無錫人浙江商籍丙子科舉

人四川酆都縣知縣殉金川木果木軍營之難

贈兵備道入祀昭忠祠弟乘槎以難蔭任山東濟陽縣

知縣

顧光旭撰傳

鮑立然字廷表歙縣貢生以捐餉議敘州同立然

弱冠失怙棄舉子業與兄業齋於杭里中營廣厦

數處任族人居之不取其直乾隆二十七年鄰邑
績溪旱民奪富家粟訛傳爲變太守聞信往覘道
經立然家立然言績溪民風淳樸必無反側請捐
資數千金平糶一邑以安徽府城西通衢有太平
橋延袤里許爲水衝圯倡首重修鄉黨中託孤子
待舉火排難解紛指不勝屈

曹文植
撰傳

程光國字虛谷號後村歙縣附貢生候補光祿寺
典簿輸軍餉議敘主事卽用以子振甲貴晉封吏
部文選司員外郎少有文名事親孝以先世鹽筴

往來兩浙間疏引不辭勞瘁緝私不避嫌怨浙商之行徽屬口岸者胥倚賴焉性急公好施城南紫陽書院歲久漸圯光國倡捐經理積十餘年勿懈既因肄業者眾與尚書曹文植勅復古紫陽書院於問政山之麓文學益盛敦睦宗族提攜寒畯待以舉火者凡數百家

程瑤田撰傳

戴漢字伊芳父爲穀業鹺自歛來杭遂居湖州漢事親孝居喪三年足不入內兄弟共爨數十年無間言冠婚喪祭諸禮悉宗朱子持身接物一以誠

敬太守胡承謀采入府志曾孫福基乾隆癸卯舉

於鄉

陳煒撰傳

朱其傳字壽芝號思貽歙人由貢生授江蘇鎮江府丹陽縣訓導居家有孝友風能屬文初以儒治生於淮仕逾年而歸辦理浙江紹所鹽務多中機宜諸商無不避之

胡廣善撰傳

朱煇字松坡樂善好施乍浦爲嘉協沿海隘口向貯海運帑鹽便商赴傾其間遺骸旅櫬每多暴露與同事捐資收瘞以數千計弟炤復繼之迄今勿

替行
狀

童階錢塘庠生蚤孤母李苦節階色養備至鄉黨
稱童孝子爲人真淳嚴正有古人風著鹿莽吟橐

公舉
事實

吳汾字方儀敦孝友業離常山常山地大事繁淮
閩侵銷加以南港舨販汾悉心籌辦商引以銷官
課以裕乾隆間歲祲汾與衆商請捐穀助賑赴楚
買穀頗難其人當事素知汾卽委之往返如期民
得以濟人有貰其屋無力繳租將他徙汾慰止之

復給月米又多蓄棺木以待貧不能殯者鄉人多

義之

吳錫麒撰墓志

胡夢檜字汝調錢塘人乾隆戊辰進士選授廣東
永安縣知縣戊寅粵中荒歉官倉平糶例止出十
之三夢檜多設米廩便宜放糶旋白制府懇求破
例制府因下其議於各屬皆不拘常格儘放兩粵
貧民沾惠甚溥實自夢檜勦之邑有鐵潭書院曠
廢日久捐俸葺整并給膏火延名師內陞主事終
養乞歸又倡修杭府仁錢學宮事載杭世駿杭府

學碑記

梁國治撰傳

沈孫連字礫人錢塘人乾隆壬辰進士由編修擢御史八齡能詩性孝友方正自持言不及私人亦無敢干以私者癸卯與順天鄉闈房考得士並有文名門生謁見禁家人毋索闈禮力卻其贄曰吾亦寒士未嘗盡禮於師其斤斤多類此年五十卒於京邸囊橐蕭然常語人云人當清白遺子孫操守可知已有有聲粉墨詩集子學厚嘉慶丙辰進

士入翰林

潘庭筠撰傳

王仕基字自堂錢塘人原籍歙縣弱冠時卽有經濟才以議敘主事選刑部洊陞郎中京察授肇慶知府肇郡爲兩粵鎖鑰地瀕海多盜艇仕基下車卽董率屬員分段按捕添設槳船曉夜巡邏不數月盜不入境尋擢南韶連兵備道終養乞歸卒於家年正強仕人多惜之

程振甲撰傳

許肇號恕堂仁和庠生議敘道銜性伉爽好義曾歲修府仁錢三學開濬省會河道乾隆四十九年錢塘學西廡燬於火鄉人出資重修肇捐金董其

事工成費不繼者並任之

錢琦重修錢塘縣學碑記

倡恤婺會

修育嬰堂設錢江義渡他如施棺掩骼捨藥物施

棉衣及修造橋梁道路義舉甚多

公舉事實

陳琪字其玉仁和人乾隆乙卯進士授編修洊擢

宮詹視學湖南造士有方積弊一清以疾卒於郴

州使署性至孝未遇時母袁病劇琪擗天而呼遂

刲股和藥以進戚里咸稱孝焉

述行

邵志純字懷粹仁和學生性孝友工古文嘉慶元

年應

詔徵孝廉方正志純於父母歿後繪遺像懸室中事如
生時數十年不輟又慮節孝婦女日久湮沒與諸
紳士請於大吏立碑杭州府學合郡節行皆得勒
石以備志乘採擇

孝廉方正
事實冊

項朝槐仁和人陞勳子以館班補陝西長安縣主
簿時教匪滋事於嘉慶二年率領鄉勇勦捕身先
衝入賊陣殺賊多人因馬陷泥淖被圍受傷陣亡
奏奉

硃批可惜著加倍優恤欽此准部議給雲騎尉世職襲

次完時給與恩騎尉世襲罔替

王昶撰傳

欽定重修兩浙鹽法志卷二十五終